

越  
縵  
堂  
文  
集

越縵堂文集

卷八

會稽 李慈銘

陳壽祺王星誠孫廷璋三子傳

吳縣潘侍郎祖蔭既刻越三子集其友李慈銘作三子傳

陳壽祺本名源字子毅一字珊瑚浙之山陰人祖榆英嘉慶庚午舉人官秀水訓導生三子曰錫曰書烈曰文杰文杰早殤錫娶婦黃五月而卒無子書烈娶婦陶生君訓導命以後世父而書烈卒無子故君兼後小宗訓導故貧君早喪所生母育於黃恭人幼善病黃恭人日夕紡績以營藥餌顧讀書敏甚訓導深惡之攜以之官及訓導卒君所生父以毀亡時君年十四矣隨黃恭人扶四喪還山陰無期功之親無田無宅賃大木橋旁陋巷三椽以居黃恭人并日而食爲鍼黹或數夕不寢得錢以給君入塾學爲文而君益銳進更五年補縣學生又二年舉于鄉又七年成咸豐

六年進士改庶吉士又三年散館改刑部主事同治元年粵賊據紹興君  
請急浮海至滬迎黃恭人及其帑入都旋充提牢廳主事兼辦秋審補奉  
天司主事擢司員外郎隨尙書綿森公赴湖北勘獄京察一等未及引見  
以丁卯夏四月猝于京邸年三十有九初訓導娶于李予高叔祖孝廉府  
君之孫也故予與君爲中表兄弟君之補諸生也予祖父行皆喜曰訓導  
有後矣君天性伉爽無城府見人無親疏皆率胸臆與語人亦樂近之事  
親孝嘗自塾歸黃恭人持稻糗及肉食之君問曰母食乎曰食矣及夜黃  
恭人詣厨下暗中食君持火燭之則冷菜羹半甌淘麥屑也君持甌泣黃  
恭人亦泣及歲甲子二月黃恭人年七十君稱觴于京師予與平君步青  
謝君鉞往祝夜同宿君家君言之淚猶涔涔下也君文章警敏不由師授  
尤喜爲詩詞情藻豔發旣年少入翰林篇什流播人爭傳誦而竟不得畱  
館職旣改官勤習曹事援律比例鉤抉爬梳日步行入署治獄夜閱爰書  
輒至漏盡嘗召試軍機章京列高等竟不用旣迎家至京益困敝衣垢面

跋涉泥淖而吏事益精曹中疑獄悉委之又自授其三子經以其暇事吟詠治小學故甫三十髮盡白竟以積瘁死君娶于劉生子三長者娶婦有子矣君既卒數年而黃恭人猶在堂

王星誠本名于邁又名章字平子更字孟調亦山陰人父學厚道光甲午舉人慈湖書院山長君幼穎異目多白眉有奇采甫成童爲文卽刻意自異不蹈故常爲詩歌鍤心鏽腎見者歛手山長故予族父青田先生高第弟子也以文章名一時少許可顧奇悉君嘗徧攜其文以夸于客甫冠受知于知府徐君榮學使吳公鐘駿試皆第一補縣學生名大噪君早失恃比長而繼母又卒山長恐君試失時遂以君出後其從祖父君不敢違及爲弟子員釋菜于郡時宣宗崩已逾百日守令諸官皆吉服踈事君獨青衣徐君以其爲國師也詰之君不對未幾而山長卒家素貧時山長三娶妻甫數月君姊妹未嫁者二人一弟眇而甚弱君已娶婦有子鬻鬻不能繼于是始客游初爲餘姚令宋賓王掌書記者數年繼客于蕭山予自丁

未冬與君角藝于塾務爭勝以能相高而相得甚君爲希有鳥賦以贈予  
賦大鵬行以答之泉同補弟子員益相親閒日輒過從以所業相質證或  
上下議論窮極幽眇盡晝夜不止意氣凌厲蔑視一世以爲兩人外無可  
與言者或出詣人必兩人俱抵掌高論歌噱互作坐客輒縮脢避去時御  
史宗先生移辰方里居鄉四賢講社招致英俊予與之皆箸錄一日予與  
宗先生論學不合宗先生嗤點予文君聞之怒甚以告予予遂不復至宗  
先生門君亦不往宗先生婁好言相謝兩人始復稱弟子然終不以所作  
示宗先生矣君旣客游間數月必歸歸則必過予信宿或至十日始去而  
鄉簡詩文往來曹江上者相望也及丙辰春君始遠游由京師至河南依  
其叔父故副都御史履謙于河防副都以憂歸君遂歷客豫中諸牧令嘗  
寓書予曰自客大梁始知鄉里之多才而貧賤之可樂蓋數年中無旬日  
不夢至越縵堂也越縵堂者予讀書處也已未夏予入都君亦來應京兆  
試則已病脾泄精神頽竅予方被橫逆之禍大困相見惟咤咤抑鬱無復

向時意矣未幾同入試試畢君寓邑邸病益甚榜發中副車越日遂卒年二十有九時君有戚誼數人發其匱得金數溢買棺以斂今猶肄城南擴誼園也予方與同人謀之將以明年歸其喪君娶于施生二子一女

孫廷璋後更名淳溥同治元年復故名字仲嘉一字蓮士會稽人孫氏自明正德中江西巡撫忠烈公燧爲名臣其後益大閱閔爲江以南冠忠烈本籍餘姚其孫吏部尙書清簡公鑑始居郡城入國朝稍衰君曾祖柟爲縣諸生祖晟益貧矣父慶深以善刑名章奏客督撫者二十年家始裕君幼精悍躋弛喜爲刻珊瑚繪之文不治小節好諧侮人人多疾之甫冠應童子試時學政吳公鑑駿經學大師也以維黍二字題試會稽君獨本周禮爾雅故訓爲說吳公大奇之擢弟一補諸生道光己酉充拔貢生旋舉于鄉明年試國子監學正學錄第一授學錄升助教癸丑告歸改教職選遂安教諭未上丁父憂淳丁母憂入質以知府候選謁故督師勝保于皖不得當歸而浙江巡撫王壯愍有齡檄治文案時軍事急餉不繼浙西嘉

湖諸郡已盡陷餉獨恃甯紹壯愍先與將軍瑞昌公劾罷團練大臣邵文  
靖燦以王副都履謙柔愿易制特薦之佐團練專司越餉以濟軍而越人  
已疲甚副都不能爲越紳之爲副都效奔走者類貪汚多飽私橐壯愍婁  
檄餉不如額遂積與副都閩副都劾壯愍侵官擅威福君旣爲壯愍所委  
任又與副都故交銳意解紛以爲餉可籌而民不病乃返越以巡撫檄行  
事越諸紳大怒激副都出疏劾君及浙吏三人以爲巡撫爪牙壯愍亦疏  
劾越紳四人爲副都黨相持朝廷下其事于學政張文貞公錫庚而桐廬  
知縣倪某復計君索賄冒功事于副都副都露移巡撫壯愍遂並疏劾君  
請褫職按治復下其事于學政及將軍讞未定而紹興陷杭州亦破巡撫  
學政將軍皆死節副都竟逸去論者謂浙事之壞由紳撫之交証餉事其  
樞紐也而君之疏節闊目授人抵巇志用不遂卒至對簿亦可悲矣君自  
賊中間關至越迎其帑至甯波至上海遂入廣東客肇慶知府龍川知縣  
幕者各一年所至鉏鋟乃挈家浮海歸前事得白復原官君遂入於潛貨

田數十頃大治佃于山中而病作歸遂劇以丙寅十月卒年四十有一君素無鄉里名見俗士輒瞠不言或示君以所作君笑而仰視屋故爲謬語以故益無知君者比入京師名乃大起歸而與予交益治經史務爲本原之學歲丙辰予館君家博節子以禮者居亦相近三人皆嗜書日出閑市以所得奇秘相角勝或互讐撼有所剏獲相告則喜躍大叫賓客僕隸見者無不愕眙以爲狂間與君爲詩詞分題刻燭君務鏤鏤隱僻幾至腐穎每一篇出千鍛百鍊必于奇麗蓋其天性也君素喜經疏小學爲楷書精絕而結體必依說文娶于高生子一星華予門下士也未冠補諸生好經學詩文有父風三子者陳子最和厚無忤于人雖甚不肖者未嘗有惡言加之孫子動與俗違仇怨日積王子稍溫默而不可一世之概則較孫子尤甚焉孫子長予四歲予長王子二歲而與陳子同歲生皆積瘁早寢有憂生之嗟每相聚宴語日薄西崦攬浮雲數落葉輒慨然念歲月之易盡懼修名之不立王子之歿于京師也予與陳子同視斂泣然流涕以爲既

痛逝者行自念也乙丑予歸至杭孫子亦自粵還須翫翫矣語予曰箸書未成而老已至柰何陳子抵予書曰君歸我留南北乖異欲如往時宣武街中同居二年歌哭相答此生可再得乎孰知歲未再祺二子繼逝今又四年矣予以孤露羸病之身塊然獨立寄家遠役浮湛冗員且執筆以傳三子而譏定其遺集悲夫陳子箸有纂喜堂詩集四卷青樓閣詞二卷越語古音證二卷王子箸有西鳬山居詩詞若干卷孫子箸有亢藝術文集勉惲堂詩集共若干卷玉井詞一卷王子詩大半散佚孫子詩詞經亂亦多燬侍郎爲陳子房考師與孫子故交契王子則知之於身後者今次弟刊布其集以傳于世三子之不亡侍郎力也

訓導連君傳

古之所謂鄉先生沒而可祭於社者非僅以教子弟興廉讓也本其肫然仁物之心由一家以推之宗族推之鄉黨以及於一國而其所施爲遂可爲後世永賴而國蒙其利嘗攷周官大司徒以鄉三物教萬民其二曰六

行孝友睦姪任恤而不然者有刑其屬族師則書其孝弟睦姪有學者聞  
師則書其敬敏任恤者而鄉大夫三年大比攷其賢能賓興之故朝有得  
人之效野無滯賢之歎後世鄉失其職鄉舉里選之法變而爲九品中正  
又改而爲科舉士之賢能特出者無由自見乃退而自力於鄉以展其效  
於國然朝廷終無以旌異之雖功行顯顯萬衆指觀亦止託於儒生之文  
字以冀或傳於後若上虞連君樂川者爲可慨也君諱仲愚世居上虞之  
查浦自少爲縣學生有聲然不屑爲科舉之學家世衣冠田廬殷賑內行  
全備善無不爲而其一生所致力者在江海兩塘蓋查浦爲上虞之西鄉  
其地負海前臨曹娥江而承新昌嶸兩縣之下流山泐瓴注潮汐廖擊於  
浙東塘工爲最險君孰悉利害銳身任事於道光三十年則有塞十七決  
口之役於咸豐三年則有築臨江大牆之役於賀家步則立柴塘以護之  
於後海之石塘則爲衆擎會以守視之又以孫家渡爲全塘扼要之地營  
別業其上建留耕山房及扞海樓蓋將終身焉於此而君亦旣老矣未幾

遂卒蓋竭其財與力於塘而一息不自解亦可謂能捍大患以死勤事者  
也然而宅里之表無聞配社之賑不及而所謂賢能之興者皆出不能效  
一官處不能善一事浚公私以爲己利而已嘗慨近世既以至庸極陋之  
文取士相沿成格莫敢變議其不能得人亦夫人知之而無可如何至於  
孝廉方正以及人才遺逸等之舉本朝廷之特典有亡多寡非有恆例宜  
若可以得人而何以所舉者率多鄙詭險汚惱名實而不顧求如君者蓋  
千百不得一焉下喪其真而上受其弊此論世者所爲太息而不已也以  
君之所爲於周官六行無不備而彼之所謂恤者不過振憂貧者耳蓋其  
時溝洫澮川之制畫然一定所以固堤防而時蓄泄者上之人無不以爲  
先務自遂人而下官盡其力無待於民亦以事之難者不敢以期之人而  
賢能之所書不過振恤而已也然則如君者使得生於其時其設施又何  
可量哉君以援例候選訓導加光祿寺典簿銜生於某年月日卒於某年  
月日年七十曾祖羽豐祖彭年四川忠州直隸州知州父聲佩候選通判

娶陳氏子六人茹同治丁卯副貢候選內閣中書芳候選州同尋藻荇俱  
國子監生衡優廩生孫十一人爲諸生者三人君之規畫塘事編修俞君  
樾爲墓誌言之已詳故述其大要其它義行亦弗之及所著有塘工紀略  
四卷敬睦堂條規一卷

李慈銘曰事非知之難行之難士夫平居議論視天下事無不可爲及當  
之鮮有不撓者歲乙丑越中大水西江塘大決余時里居郡守高君強之  
治塘余始視地形籌土石薪木之費以爲事可立辦既而吏之老而悍者  
掣其權民之獵者梗其議冒利者競進嫉忌者力構衆口囂騰危欲敗而  
槿免始歎任事之才不易而鄉里爲尤難也比十餘年浙吏大治仁和海  
甯兩境海塘歷巡撫已四政糜帑金至七百餘萬而事猶不集海甯尖山  
之塘浙西稱最險與浙東之查浦比者也官吏道謀未知所措安得起君  
而詢之哉

六世祖天山府君事略 同治七年九月

先六世祖諱登瀛康熙五十一年進士充武英殿纂修官授內閣中書分校月令輯要御選唐詩兩書書成不請議敍歸旋選授江西安仁縣知縣入都引見聖祖特召諭曰汝由內廷出宰須爲好官雍正元年充江西鄉試同考官旋兼攝萬年署鄱陽以與上官齟齬遂得罪去此府君自序云爾年譜日記遺令家傳及詩文稿一切所記皆同慈銘案月令輯要卷首所載職名則題曰進士候選知縣李某竊意武英殿纂修之差舊屬翰林非進士及中書所得與而府君平生慎宓嚴重無一妄言且自述歷官不容有誤今夜偶閱程縣莊文集中安徽布政使陳德榮字廷達安州人行狀有云公成進士觀政京師康熙時海內承平久天子篤意右文特隆校書之選有詔命取壬辰即五年科進士充纂修公得入武英殿乃知觀政進士悉入校書爲是科特典陳公後亦以期滿歸里至壬寅始選授湖廣枝江縣知縣近人鮑康所輯內閣漢票籤舍人題名錄無府君名則以道光二年內閣失火檔冊盡焚鮑君僅據所見方志綴錄成之故挂漏譌舛不可殫

指無足訝也府君之箸述今已經亂盡亡遂至官位亦無可參考矣府君字俊升因居西郭郊有邨名梅谿故號梅谿幼孤貧爲諸生旋棄之游各

省督撫間爲司章奏後以直隸滄州

時未有天津府治州尙屬河間

金氏籍補河間府學

諸生學使武進楊學士大鶴奇賞之三試皆第一滄人許其越產學士力

持得免旋舉戊子順天鄉試至壬辰成進士時年已五十七矣安谿李文

貞公當國方主張朱子之學牢籠天下士士之浮薄不學者遂羣詆陽明

摭拾不根之談以逢時好府君素私淑王氏深惡之先於廷試朱陸異同

論力矯其說遂抑置三甲文貞已嘆之矣及入內廷持議又與文貞忤故

不得留比宰縣不擣家一人不置賓客力鉏豪彊扶貧弱尤恤寒士又積

與布政司參議李蘭按察使積善忤卒以持校官賴良竹讒諸生爲盜獄

被劾故出坐謫戍永平衛遂卒於戍年七十五府君自四十喪偶有一子

一女遂不復娶終身不置媵嘗愛鑑湖三山間風景欲於畫橋龜山上營

草堂爲終老計未及遂屢形之歌詠繪鑑湖垂釣圖自爲之記當時名士

長洲汪先生士鋐等題詩者數十人今上頃王氏効石於天香樓法帖者  
是也家居日與同郡劉正誼戒謀等二十人繕建楊廉夫詩巢於臥龍山  
麓吳越時西園故址也祀唐賀賓客以下六君子有詩巢倡和集行於世  
府君所交徧海內作詩至數千首顧深自晦不欲暴於世其卒也甫得旨  
赦歸而未復官遺令若朝廷不復官者母得求人志墓故府君事多弗詳  
其見於他書者若汪先生及寶應王氏式丹天門陳氏文燭集中皆有贈  
府君詩府君久客大僚爭延致相引重善析疑獄所平反者甚衆其佐粵  
幕也嘗強請當事焚耿鄭之變株連者名籍獲免者數千家嘗自言吾多  
陰德子孫必盛府君一子諱杜字端木國子生雍正中攷授州同知是曰  
橫川府君以居西郭外之橫河也孫八人長諱熙字文孟國子生是曰蕪  
園府君慈銘之高祖父也次諱建烈字武最少者諱建煦字載皆舉人曾  
孫二十四人諱策堂字肯筠字禮皆舉人肯如公者慈銘之曾祖父也是  
曰構亭府君禮如公官陝西洛川縣四川銅梁縣知縣策基字景鳳詔字丹

壽芳春

壽春字景如

策坡

字克臺

皆諸生

璽玉潤

歲貢生

元孫四十七人釗

字輝

舉人官

左翼宗學敎習

諱欽之

敬

青

字良錫

錫勛

字詔

文鑒

皆諸生

敬

之公慈銘之祖父也是曰鏡齋府君

諱鉉以字行配京官

江蘇高郵州界首司巡檢

銳官廣西蒼梧縣東安司

官州同知慈銘之本生祖

巡檢來孫八十餘人光涵由翰林院編修爲山西

襄武府知府師泌舉人

官青田訓導攀桂諸生官

四川雲安場鹽大使鄂輝

璽玉潤

歲貢生官訓導攀元官

鼎光潔起元治皆諸生

光瀾官直隸承德府豐寧縣黃姑屯巡檢攀元官

四川新都縣典史昆孫

爾雅作昆孫注是也

一百廿餘人國秀進士官兵部主事國彬舉人官刑部主事國惠

官河南汝寧府通判國和拔貢生官八旗敎習庚丙炎葆辰丙煥國守謙

是言同也壽嵩從龍壽銘皆諸生慈銘於兄弟次爲第五十五人也

十一冊七

太子太保體仁閣大學士周文勤公神道碑

同治六年夏四月丁亥大學士商城周公薨於位上聞軫悼卽日命睿親

王率侍衛十員賜奠賜陀羅經被降詔褒惜推恩子若孫並下所司賜卹  
如例予謚文勤維公揚歷四朝徧踐六官疊主文柄清華暉映恩禮始終  
蓋以慎密一心克孚帝眷有非外人所能盡知者而一節之士矯行立名  
思急起以赴功輒以非常建白過望大臣而抑知從容廟堂敬以事上勤  
力正過夷險一致固足以鎮百僚風天下也公諱祖培字叔滋一字芝臺  
先世自婺源遷汴遂爲河南光州商城人至明之季侍郎汝璣都御史汝  
彌從兄弟以進士起家其族始大曾祖逾錢諸生祖作淵廣東惠州府海  
防同知父鉞嘉慶六年進士歷官順天府府丞鴻臚寺少卿三世俱以公  
官贈光祿大夫曾祖妣氏楊祖妣氏陳母氏祝俱一品夫人鴻臚公有吏  
治經術訓子曹嚴公幼挺異濡染家學文譽驟起少長補商城縣學生年  
二十六中式嘉慶二十三年河南舉人明年偕仲兄按察君同成進士改  
庶吉士又明年授職編修時伯兄巡道君先以進士起家由庶吉士官戶  
部主事公與按察君繼之而公叔父武進君又於是年成進士入翰林言

科名者以爲盛事道光元年爲順天鄉試同考官二年爲雲南正考官四年丁鴻臚公憂七年服闋充國史館協修官十二年升國子監司業司經局洗馬充文淵閣校理十三年充日講起居注官翰林院侍講是年大考轉侍讀十四年升右春坊右庶子旋擢翰林院侍講學士十五年協同內閣批本十六年充漢軍敎習十七年督陝西學政轉侍讀學士十八年升會事府詹事旋丁祝太夫人憂二十一年起原官充文淵閣直閣事二十二年稽察左翼宗學升內閣學士兼禮部侍郎銜旋擢禮部右侍郎二十四年兼署兵部右侍郎轉禮部左侍郎調工部右侍郎兼管錢法堂事務二十五年爲會試副考官調刑部左侍郎二十六年偕尚書賽尚阿公馳勘江南江防善後事宜校閱江蘇安徽江西三省營伍甫覆命爲浙江正考官二十八年賜紫禁城騎馬三十年充寶錄館副總裁經筵講官咸豐元年升刑部尙書充寶錄館稿本總裁二年爲會試正考官三年以失察要犯劉秋貴瘐斃一案降三級調用卽日補都察院左副都御史升吏部

左侍郎四年升左都御史擢兵部尙書五年署順天府尹六年兼署工部  
尙書加太子少保調吏部尙書八年督理五城團防九月協辦大學士兼  
署戶部尙書九年調戶部尙書兼署吏部尙書充武英殿總裁爲順天鄉  
試正考官十年爲會試正考官車駕東狩爲留京辦事大臣十二月拜體  
仁閣大學士管理戶部十一年文宗崩爲恭錄飭儀大臣兼辦定陵平安  
峪工程充實錄館總裁同治元年調刑部充實錄館稿本總裁二年充文  
淵閣領閣事四年教習庶吉士晉太子太保以山陵告成賞戴花翎其間  
充殿試讀卷朝考覆試大考閱卷以及蔭生教習拔貢優貢等考試其三  
十餘次公一以敬慎小心翼翼旦夕趨事毫而益勤凡處大議平大政博  
咨集思未嘗稍自專其使江南也時和議初定夷性不測軍民惴惴公冒  
暑跋涉深籌利便以爲長江兩岸礮臺犄角門戶雖固而蘇松二府在江  
防之外港湏紛錯而地殷賑夷所耽伺宜於上海寶山之間若閔行鎮得  
勝港東汊口等處廣儲舟械擇地屯戍黃浦江南通浙江之嘉善北通泖

湖以達蘇州宜於濱山湖長連涇等地設伏拒守厚集其勢凡所經畫皆足永久校武三省嚴而不煩都試之日威儀陳列上下凜凜而鞭貫不敝事畢既行驛無留宿主試浙江榜發三日星馳北返抵蘇州又奉命偕侍郎柏葰公讞昭文縣吏薛桂獄七日臘具人無驛驛咸豐之季奸黨傾仄大獄數起島夷蹈瑕國如綴旒公樞柱其間不爲同異事持正論詣隙於芹及今上踐阼兩宮臨朝祲翳廓清公節益著首上疏更正祺祥之號改元居正天下稱頌特詔褒美以爲關心典禮周詳慎重委任有加而公益謹明譏陳孚恩何桂清之獄張錫嶸明堂宗祀之疏皆析理準情無所阿徇兩備宣宗文宗實錄皆總辦稿本夙夜屹屹手自鉤稽網舉目張鉅網咸秩乃至文義點畫偏旁正俗必再三考核致慎致詳上邀懋賞及於子孫至公之殉而有宣力彌勤之報然後知公之精白任事式簡帝心而上之倚畀未有已也公與按察君友愛甚篤按察以池寗太廣道入覲公時爲侍郎召對詢家世公稟悉宣宗喜曰卿讀書世家及公閱兵江蘇而按

察君陳臬於吳旌節相連觀者噴歎公衡文最久門生徧天下所特薦者如刑部郎中易公棠吳公廷棟太常少卿李公棠階等後皆爲名宦予館公家久課公之幼子公虛己下詢日久益敬常稱譽不出口乙丑之夏予南歸省親公置酒爲別執手慨然曰君太夫人年未老君行必速返予老矣懸一轎以待君也烏乎孰知予歸再逾祺而丁大故苦因之中復聞公訃今再入都而公葬已克期公子輩將以公柩歸矣公生於乾隆五十八年十二月二日距薨之歲七十有五配劉夫人生子五某某側室朱生一子某胡生一子文令恩賜舉人以主事用女二長適兩淮鹽運使方濬顧次適河南彰德府知府賈致恩皆劉夫人出孫四人某某公次子戶部陝西司員外郎文俞恬靜好學於公諸子中爲最良以某年月日葬公於某山之原屬予參次公行事以文其隧道之碑予不敢辭銘曰

聖清撫運樞庭執機東閣四輔以翊皇維猶唐僕射百僚具師承乾布化不言而治維公翼翼麟遊鳳儀接迹承明鸞拜帝墀民命所系祥刑是司

公再執奸獄以不疑六府九貢國仰度支公長地官綜其勢絲協規蹈衡  
尺矩不逡帝曰休哉實惟予毗溫樹不言益畏而寅受終紀政大法所治  
公再珥筆謨熒烈垂潤色鴻業荷天子知云何徂謝不究其敝蘇山盤薄  
淮流逶迤輦茲宰木甘棠永思國史有紀我辭不歎

誥授光祿大夫建威將軍內閣學士前戶部尙書軍機大臣顏孔公

神道碑銘

光緒十有一年八月甲寅內閣學士顏孔公卒於位雖公早歷膾仕中躡  
於外逮晚大用終始一節而以際時艱錯政柄不恆朝論是非牽連去位  
至歿而邱典不及天下惜之然識與不識無不稱公爲長者恭繹甲申三  
月慈禧皇太后懿旨謂祇能循分供職經濟非其所長蓋公之純固一心  
久掌堂陛之間更歷時歲必復枋用而惜公之遽去也公諱景廉字儉卿  
一字季泉顏孔氏正黃旗滿洲人世爲吉林鉅族五世祖諱喀爾吉善前  
鋒統領雍正中以副將軍出師西藏凱旋授內大臣曾祖諱長生官頭等

侍衛妣尼嗎察氏祖諱和英額官頭等侍衛妣舒穆魯氏考諱彥德乾隆癸卯科舉人官綏遠城將軍妣瓜爾佳氏側室任氏三世皆以公贈光祿大夫妣皆一品夫人公任太夫人出也於兄弟行爲季幼沈敏好讀書天性純孝年十四遭任太夫人憂間一歲復遭外艱哀毀骨立弱冠補諸生道光己酉選拔貢生第一是秋中副榜咸豐元年舉於鄉二年成進士改庶吉士三年授編修遷侍講充文淵閣校理四年充日講起居注官晉侍講學士充文淵閣直閣事五年四月擢內閣學士兼禮部侍郎銜由庶常不三年至卿貳前此未有也旋充福建鄉試正考官六年充會試覆試殿試朝考及散館等讀卷閱卷大臣授鑲白旗蒙古副都統七年正月授工部右侍郎兼管錢法堂事務十一月賜奠朝鮮嚴絕苞苴東國稱頌八年三月復命適英夷至天津故輔耆英以侍郎銜命往文宗召見公問某能任事否對曰其人怯懦恐辱國天顏不懌已而果然文宗益眷公有大用意而時枋國者側目目矣六月調鑲紅旗滿洲副都統八月充順天鄉試

監臨九月科場事發忌者欲因是中公以失察議降調文宗察其謬改留  
九年二月調刑部右侍郎三月署吏部左侍郎十月出爲伊犁參贊大臣  
文宗召諭公曰汝年尙壯須歷練邊疆重寄非左遷也公感激流涕誓以  
死報十年四月抵任凡奏疏皆自屬草旋命鞠前塔爾巴哈臺參贊大臣  
濫保異姓台吉冒襲哈薩克汗獄十一年八月鞫阿克蘇辦事大臣改征  
回賦私設鹽課獄十一月鞫葉爾羌參贊大臣苟歛擅殺獄所至皆得情  
無縱濫者同治元年七月調葉爾羌參贊大臣葉爾羌者南北八城之轄  
轄也漢回雜處餘孽潛伏時西事萌芽反側蠻動俄人耽耽哈薩克布魯  
特諸部多貳於俄安集延部屢出蠹擾公籌餉治軍持以鎮靜時朝廷方  
倚重公公於中外交涉事屢密疏以聞二年十二月以舊疾發乞休同官  
中以事遂落職發籌夏軍營自效四年十月故安徽巡撫翁文勤公卒於  
花馬池軍中公代領其衆屢有戰功五年十月授頭等侍衛爲哈密幫辦  
大臣時甘涼道阻六年冬始募勇得千餘人騎不滿百持二十日糧餓隔

西進七年正月抵玉門時則有黃花營之捷安西州三道溝之捷公以哈密巴里坤皆孤懸不可守請暫駐後路扼畧逆之衝得旨報可閏月抵安西時則有四五道溝清水泉之捷雙城堡之捷羅家莊之捷三水梁之捷大山口之捷白家莊之捷十月移鎮敦煌益布置設張逆不得逞八年八月抵哈密時漢城殘破築壘於蔡把什湖與辦事大臣文麟公連營相掎角時烏魯木齊回逆妥得璘率吐魯番和卓瑪納斯漢回等萬八千餘人東犯至沙棗泉潛約哈密回王邁哈默特爲內應王素愚駛其母福晉邁里巴鉗以賊書呈官軍誓衆力守公遣使獎勞助以兵而與文麟公分飭所部逆勦賊指授方略前後夾擊凡大捷三小捷五連戰六晝夜殲賊千七百餘人奪獲器械牲畜不可數計賊始竄遜事聞得旨嘉獎十年八月密詔以俄人已得伊犁將圖烏魯木齊命公亟往規復公卽率所部度天山駐巴里坤十二月授烏魯木齊都統十二年四月進駐古城七月陝回白燕虎率衆萬餘圍哈密破回城分黨擾巴里坤安集延酋怕夏率漢回

撲沙山子以應之公以一軍堵住其間日飲酒習射故示閑暇而分遣部將往援兩城先破賊於沙棗園解沙山子之圍復大戰於哈密之泥基頭殺賊千餘遂復回城自逆遠遞於是哈密巴里坤復完論者謂是役也新疆治亂大局系焉未幾復破白逆於三道廠十三年二月復破之於西泉六月復破之於濟木薩又大破之於柳樹河禽斬無算八月授欽差大臣督辦新疆軍務公規畫全局將大有所設施而爲忘者所尼光緒元年五月授正白旗漢軍都統召還京九月入觀授都察院左都御史賜紫禁城騎馬二年二月署工部尚書三月命在軍機大臣上學習行走四月充會試覆試閱卷大臣五月充敎習庶吉士七月充崇文門副監督十月充總理各國事務大臣三年正月授軍機大臣擢工部尚書四年二月調戶部尚書十二月充國史館正總裁六年三月充會試正考官八年十二月充經筵講官九年六月以失察戶部司員雲南報銷事降二級調用仍留軍機大臣總理各國事務大臣七月補內閣學士九月遷吏部左侍郎十一

月授兵部尙書十年三月復降二級調用十一年四月補內閣學士八月署鑲藍旗蒙古副都統綜公一生出入歟歷外總師于內握政本恩榮光顯受三朝之知遇不可謂不深而柴立無黨屢起屢蹶其翕訛之口固不足論卽知公者亦以爲忠厚慎密應變將略非其所長故以左文襄公之知人其始亦推爲西北諸帥中第一而終以書生少之然當公之初抵伊犁也故事哈薩克貿易事訖卽出境後以貨壘鬻許留兩三人於西門外支廬樹柵守以度歲後漸築室易柵而垣公至時已列屋三百餘間周二里許矣公謂患在肘腋發將不可制議毀之將軍札拉芬泰公執不可未幾札公卒公攝將軍乃疏言利害請以便宜先事踢平或忧以勢迫恐激變公不爲動又請俟旨公曰聖明在上無不允者卒毀之命下如所請其在葉爾羌也嚴禁防軍之以錢貸回民而重取其息故去之日回民男婦數千哭於瑪札爾之廟其在樞廷也戊寅冬停捐納例公竭力贊成或曰能保後之不復開乎公曰名器濫則廉恥消雖一日之停庸愈於已庚辰

冬文恪公全慶正揆席皇太后意以協揆屬公公以文恭公靈桂名位在  
前力讓之新疆既定將軍忠介公金順上公昔年戰守功公謂邊帥推功  
樞臣恐開迎合之漸請勿許壬午以後言事者謹起以詆訐大臣爲切直  
同列或不平公曰政府如射之有的言者期中的耳何憾於我且居政柄  
而言者無忘國家之福也此輩年少氣盛不知擇言奚足校嗚呼卽此攀  
犖數大端公之嚴正仁恕務持大體雖古名臣亦何以加焉慈銘以庚辰  
會試出公門下六稔之中惟一進見而公心知其賢在戶部時陝西司員  
主橐缺出公欲以相屬有同列爭之公笑曰是非以此爲得失也遂別授  
人是可謂愛人以德者矣公生於道光癸未六月二十五日享年六十有  
三配宗室夫人齊齊哈爾副都統署黑龍江將軍諱玉英女子四人長治  
麟光緒丁丑科翰林國子監司業次雙格殤均宗室夫人出次樹格殤側  
室張孺人出次兆麟尙幼側室王孺人出三女皆不育治麟以十二年十  
一月二十七日卜葬公於西直門外經廠莊之原持公行狀屬文神道之

碑慈銘蘊惟碑志之例辭尙簡重偏裨戰績不宜著之帥臣所以備書之者欲見公之與西事相終始而天山南北回夷之向背形險之得失亦略具於此俾後有攷焉系之銘曰

公遇文宗四載隆隆將以大庸赤舌中梃畀以西極是撫是塞溫宿讞絲鼎湖上超攀弓而號鳥夷環視花門羣獮戈璧以拂公秉戎旂炊矛寢鋒出入廿年橫流漸平謂公厭兵召還帝京遂陟八坐斡樞執鈕以息水火鎮靜不驚地官受成養福不名匪鼎覆餗大白若辱盛兮衰伏臣力已殫願國以安形去神完營葬都邑高原是式利禩千億

誥封光祿大夫追贈三品卿銜前四品卿銜內閣侍讀潘公墓志銘光緒九年正月甲辰致仕光祿大夫吳縣潘公薨於京師米市巷之私第越三日丙午天子詔曰軍機大臣刑部尙書潘祖蔭之父四品卿銜前任內閣侍讀某迎養在京精神素健茲聞溘逝軫惻殊深加恩追贈三品卿銜賞銀二千兩經理喪事於是凡百在位感世臣之優眷侈朝廷之殊遇

有以知尙書之爲國寶亟膺受錫類而公之善承善教克隆堂構其以退  
閒之身陰裨國家使天下感受其福固宜上孚帝眷有不憇遺之歎也公  
諱曾綬本名曾鑑字紱庭其世系里詳先太傅文恭公碑文公太傅第三  
子也幼穎悟有至性太傅家法嚴公與伯兄功甫先生仲兄少宰公出入  
恂恂以讀書相切礪年未冠侍太傅入京以詩文與諸老先生游咸稱曰  
佳公子道光二十年中順天鄉試舉人次年考取內閣中書時太傅久正  
揆席公奉職中祕勤習故事歷充方略館分校國史館玉牒館總校本衙  
門撰文文淵閣檢閱屢以編纂勞奉旨優叙咸豐元年擢內閣侍讀京察  
屢列一等被詔首秩二年少宰公爲內閣學士尙書已擢上第入翰林時  
太傅以年高久致政公遂引疾乞養親越二歲迭遭太傅及汪太夫人憂  
扶柩歸葬遂不復仕服未除以吳中撫卹事賞加四品卿銜七年尙書以  
學士直南書房公就養京邸自是優游文史宏獎後進布衣蕭然無異寒  
素卒以覃恩封光祿大夫太子少保顯榮光大朝野企踵蓋綜公一生出

處之大節以孝友忠愛爲基以和平樂育爲輔自幼奉太傅承歡朝夕不離左右而愉愉有孺子色功甫先生旣沒與少宰及季弟都轉公友悌彌篤都轉久家居公與少宰白頭扶杖出必相隨翁博之鰥簞下憈最尙書旣陟卿貳便勤王事公每勗以盡瘁尤以司寇之任天下民命所繫庭誥間至所裨尤大當咸豐之季罪人相煽竊弄威柄其燄日熾尙書時以廷尉直內廷深念國故日夕憂憤欲上疏擊之恐爲公憂默不敢言公察知之謂尙書曰吾家素受榮寵女能以此報國是吾心也勿以吾爲念尙書疏果上諸奸大驚媒孽百端賴太宗聖明計不得還木蘭之狩公復促尙書具疏固留益爲罪人所怒遂歷歲不遷大駕在灤不復召直公處之怡然同治三年吳中大亂初平百物凋盡尙書思所以救鄉里左中興者惟減漕賦一事爲最重而軍餉方急度支屢空非常之舉難於發言復請於公公曰此先太傅之宿志未得間以請女勉爲之天子仁聖萬一得請吾事畢矣尙書遂齋祓入告竟荷俞旨三吳千里歡聲如雷此尤公之犖犖

大者于公陰德何足喻哉慈銘自歲己未入都遭橫逆之禍屏居草食公獨先過訪折節忘年因得交於少宰及尙書文字往復投分日攀及辛未再入都以尙書方左戶部引分自遠修謁幾絕公與少宰繩綫有加析疑賞奇書翰日接及戊寅少宰薨逝公亦老病慨絕還往而慈銘所居保安寺街去公邸不半里猶歲三四至至於饋問尤數於前日或再三幾疲童力今年元日公手書約期三日挈其次君過余設食瀹茗流連晷頃公指次君謂余曰此兒未嘗詣人昔歲今茲兩令詣君者欲使後生見先哲風流非以科名祿位言也公卒之前日以書還日記及所借書且索通鑑目錄時已薄暮室中卒不能檢書告使者以明日將去而公卽於是夕逝矣嗚呼音翰在手凶問繼至言笑宴宴曾不踰時有生之悲何能已哉公生於嘉慶十六年五月六日午時高年七十有四公工詩文及詞晚歲尤嗜詩無一日廢書不觀今年正月方擇集近歲所作詩手自校閱所著有集若干卷初娶汪夫人公舅氏某之第五女也孝事內外壺行有聞實生尙

書由咸豐二年一甲第三人進士至今官加太子少保銜繼娶陸夫人婦德克嫗皆早卒鑑至某孺人生子祖年尙書卜以是年十一月十五日葬公於某鄉某原以兩夫人祔馳書幣來徵銘烏虞自少宰之亡余諾志其墓而未果今之志公其敢辭乎蓋至是而與公文字之交遂終古矣悲夫銘曰

前光後榮以德而尊克孝於親克友於弟彙克式穀以爲名臣入掌絲綸帝憇其勤增秩視卿遽乞其身非曰愛閒以畢晨昏非曰引年以培國珍息豐處屯以福斯民至行有本餘事在文勒此貞珉長思善人

誥授武義都尉四川駐防正黃旗滿洲佐領世襲雲旗尉封資政大夫直隸長蘆都轉鹽運使加三級鉉祐祿公墓志銘

余始與都轉額勒精額君同官戶部未相識也歲甲申三月余至天津主講問津書院則都轉實爲之主相與談道德性命之學持身居官之要氣誼相合情摯若弟昆是夏余還都入秋大病幾死都轉時致問訊饋珍藥

豪戚溢褚墨速仲冬之末余杖而能起而都轉奉其封翁都尉公之訃星  
奔返蜀矣嗚呼余之赴津也都尉公方自津歸里相去數日未及一奉顏  
色及既聞訃音而都轉致書乞志先墓且言於終制以後身已衰老將與  
草木同休不復出山自此天隔一方矣此余所爲悲涕浪浪欲爲之文而  
久執筆不能下也按公諱某姓鉞祐祿氏其始祖某由葉河從龍入關駐  
防荊州康熙中移駐成都曾祖諱常齡其官祖諱吉勒通阿某官嘉慶初  
從戎滇楚轉戰川東於達州陣亡賞雪騎尉世職父諱興倫某官三世皆  
以都轉官贈資政大夫曾祖妣吳佳氏祖妣霍齊克氏妣巴岳特氏皆贈  
夫人公幼有異稟讀書穎悟八歲而孤食世職半奉艱寢甚恃其母夫人  
及姊以女紅左膏火年十六襲職入見引見歸益攻苦兼習騎射歷官成  
都駐防鑲藍旗滿州防禦升正黃旗滿州佐領歷署正黃正紅鑲黃正白  
等旗滿州協領鑲藍鑲紅等旗滿洲佐領勤於奉公祿入不給而好施與  
或至不能卒歲猶拮据集錦銖以周餓者常隱姓氏不令人知其當官則

增孤寡口糧設義塾以教寒畯嘗謂諸子曰我掌各旗糧餉數十年無絲毫之染所存計簿沒世後可焚之墓前以見先人於地下告無愧耳公於諸子皆躬自課讀教以實學及都轉等通籍卽引疾自休壬午冬都轉任天津兵備就養北來偶出散步郊市未嘗以肩輿甫一年遽歸猶經營義冢義田孜孜無倦嗚呼善人君子式穀爾後此都轉之當官正色獨立不撓掌齧一年百廢具舉固皆稟承家教有以致之也公生於嘉慶壬申十二月二十九日辰時卒於光緒甲申十月二十一日酉時享年七十有三公娶某氏贈夫人相夫教子咸備儀法子四人長卽都轉由咸豐己未科進士至今官次蘇克精額同治辛未科進士由太僕寺主事改知縣早卒次訥木精額未冠而夭次完善孫成澤成愷成悌曾孫一人運生以某年某月葬於青城之某原銘曰

四姓貴種豐沛從王黑水導源鐘於岷陽世著勛伐爲忠爲良維公繼之羽林虎驤夙夜勤事清風肅行秉義行善德溢於鄉知幾勇退未極其翊

以裕後昆爲國圭璋消搖考終歸安所藏錦江法法與澤孔長

# 越縵堂文集

卷九

會稽 李慈銘

## 陳德夫墓志銘

嗟乎自國家以繩墨資格取天下士士之魁桀岸異者概不得自見率伈伈倪倪就裁抑以冀一當于是文章經術氣節德性屏絕弗講而惟勦襲摸擬千喙一聲挾庸惡之講章腐爛之程遞以求所謂進士之一科故人才益衰馴致大亂亂亟求才而才益不出有司之守繩墨資格益甚以予生四十年出而交天下士蓋無論或遇或不遇皆蒙然張口如坐雲霧或習爲妄言欺世取名求其慨然有志于文章經術氣節德行者無有也已德夫陳氏名驥先世自江州義門遷建昌之新城遂爲新城人五世祖道乾隆十三年進士以理學行誼爲名儒學者稱凝齋先生高祖守誠浙江分巡金衢嚴道曾祖觀乾隆四十九年進士歷官戶部侍郎總督倉場以

廉節吏治受知仁宗朝稱名臣祖希良縣學生父學洪兩淮新興場鹽大使曾祖妣氏楊祖妣氏葉母氏雷君生臺梁鼎門少倜儻負氣讀書敏絕十行俱下甫冠卽補縣學生婁試高等名曰噪時君家方盛羣從父兄行爲鄉二監司牧守者八九人而天下已駭駭多故君濡染家世見聞熟于朝章國故益卓犖有用世志銳意討論策天下事往往多中而寇禍大起江右婁被兵家遂破君佐從父尙書公及大使君守南昌又轉側兵間走吳越者數年乃入都依尙書入署爲主事得工部都水司行走日結交奇杰慷慨言事常思得間以報而亂日甚南北鼎沸尙書得罪戍邊君亦久不第益廢知終不可乃縱酒自放酒酣輒推案痛哭罵其坐人人皆起避之君益憤久而嘆曰用世不諳命也讀書養性吾事畢矣于是君晨夕抱經將著書以老而疾遽作遂不起烏乎可哀也已予之識君在咸豐己未時同應京兆試被放一日廣場聽樂杯酒間數語了了見肝鬲恨相得晚卽相訂爲兄弟自是居京師者五年道誼相勗學問相成氣節相期許或

幽憂疾病困厄侘傺相憇藉勸勉或質衣賣書相資給君嘗言吾兩人皆以質郎棄于世皆故家中落上有老親下無子京師無可容吾兩人者盍皆歸讀書君骯髒忤世視予尤甚都中人與君尤不諧顧君實服善自下如不及得予一言一字皆歎賞不絕口予每有所規應時改從得一書必持予審定以爲常嘗曰與君交五年今益歎知君之不盡也癸亥以後君過予益數時予館商城周文勤公邸中君寓其戚熊比部宅相去不二里兩人者風雨霜雪時策蹇車或步行相過從僮僕朝夕持書牘奔走君言一日不見予則思或以事故間日不相聞予亦忽忽若有所失嘗竊訝其異於疇曩而孰知死喪哭泣迫于俄頃言笑宴宴一瞬九原蓋至君卒後而予班君手札多至千百函其在此兩年中者又十之八九大率問字質疑至情恨恨不可卒讀予爲流涕緘而藏之蓋至覩之未嘗不黯然傷也嗚呼以予之湛默自守當世知愛者在朝在鄉亦尙有數人而性情旨趣表裏無間所謂鮑叔知我者則惟君一人而已而世顧以君爲狂不可近

悲夫君性沈毅能斷大事尙書于諸子行最奇君文宗季年朝事日亟尙書婁以疑事詢君君輒爲分別是非利害文宗之狩木蘭也君力請尙書以死諫且勸遠權勢辭家宰之命文宗崩行在驛召尙書君固止尙書不往尙書皆不能用及禍作戚屬奔避君毅然周旋湯火中入護尙書於獄出庄家事處分如平常人始稍稍知君而尙書之晉守京師督關兵也君佐之鎮撫內外安謐人以是偁尙書而實君之力爲多顧僅以勞平叙五品銜及縣官簿錄尙書家君亦被籍天子特詔還君贊故君雖不遇而嘗感激恩殺身者此也君兄弟六人君最長最爲大使君所悉大使君稔君久客日困婁書促君還淮南君亦亟思省覲會君弟鵬以官事入都君時已病謀倣裝偕行未發而病劇竟以客死君嘗來越深喜越之山水素工文章爲詩歌一以盛唐爲宗駢文尤警麗後一意治經尤嗜鄭氏禮嘗曰鄭之禮注卽經也又謂予曰吾此歸省老父于淮卽當從君至越買田築室終身治禮然則以君之志節使得有爲於世小智近功何足道卽不然

老其才以爲學亦必有以自見其高明竺實之資于入道尤近降而爲詩古文亦足以成一家言而天必窮之使其所志無一遂何耶君雖甚善予顧直諒不少貸病革時謂予曰君激直而頗喜人訛敢繩切君者惟僕耳僕死君譽言日至則德日損而學亦不進嗚呼今君死五年而予進退披猖動見尤悔舊業荒落仇怨日增追思君臨歿之言幽明之間負我良友蓋彌彊後死之悲而不知涕之何從矣君生以道光七年七月八日卒以同治三年十二月十二日年三十有八娶蔣宜人無子君天性孝友其卒也鵬哭之慟次年持其喪出都以次子揆清爲君後七年十一月返葬君子新城之故原自君歿後予居憂在里而大使君自官所遠致書幣鵬又自如舉以幣來且告君葬期嗚呼以君父與君弟海濱薄宦不能自給而猶懲懲于余不以生死易心則予與君平生之交所以取信于其家者固何如也非予其又誰銘君銘曰

孰才而喪之孰生而厄之孰死而惜之嗚呼君而止斯非予其疇知謂士

無奇謂出非時其易徵予辭

三品銜候選同知葛君墓志銘

自三士不升九品失御鄉舉里選彊疑於衆論興賢比能格奪於虛車懿是習俗渝媿緩急無恃不有賢者曷以維持故三代而下迺重封君之家兩漢以還遂有獨行之傳州里有訟以祝少賓宗親所資俱歸樊重蓋以備縣官之不及本司徒之得民如葛君者殆其選已君諱肇基字壽芝其先世避明季之亂繇江寧遷平湖之乍浦遂世爲浙江平湖縣人高祖諱元舉雍正五年武進士由侍衛至大同參將期門之選是曰右科雲中之臺鑾爲飛將秉義經武辛氏以之起家說禮敦詩郤穀遂傳儒業曾祖諱鑾祖諱泓仍世隱德一門穆行考諱楨縣學生橫舍傳經兼習左右之射茂材異等終沮甲乙之科匿曜不斂積慶躉裕兩世皆以君官贈中議大夫祖妣金妣張皆贈淑人君幼有識悟克稟庭誥厲志好學盡於凡童而食惠屢空闕幘罷講粲粲門子慨蘭蘚之不供綱綱帯闥仰蕪箬以自給

遂以何武誦詩之歲汎袁宏載米之船客路貧辛波瀾壯闊游子之瘁始  
於此矣未幾而所怙不天苴杖支毀兩弟系次或羸或嬰君奉事北堂慘  
踰東里日謀斗升夜隨作苦霜嚴風冽雞鳴弗休迨越冠年始游閩嶺十  
口之指仰於一身三黨之炊待於萬里而君清白有養甘旨必供草食纏  
衣銖積黍糓嫁妹之裝不牽大而已辦娶婦之禮詠弋鳬而必臧中值海  
氣毀其廬室淳膺銜恤兼以悼亡括髮雞斯星奔雨泣隱之擗踊鶴唳助  
其哀聲於陵灌芸豹隱失其賢儻卒之艱劬立業發貯起家邸店日增疇  
墅遠隔王陽有術能作黃金竇又無儲先營贍物戒周人之熾齧法孔氏  
之雍容遂能循潤諸姻獨收渙族鴉衣比室給續皆溫魚釜百厨望米而  
澆宏微克讓悉化乎內人繆形自撾欲感夫悍子雖再經寇亂轉側兵間  
危不忘仁急不遺物往往脫骖以資愍隸捨舟以濟窮流收失路之嬰兒  
嫁無歸之孤女迨至涉歷吳閩復還邦族粉榆無恙邱壘不驚乃置義莊  
建宗廟爲餧粥以食餓人修橋津以通行旅養生送死教子育孫儒業蔚

興秀孝連舉蓋周官之興三物漢制之舉四行以及歷史孝友所書義行  
所紀凡可以旌門表里賜帛受粟者君之所爲幾無不備焉嘗論浙西之  
地輶轄吳會襟海帶湖山峯鹽官絲盛尤著膏腴上地畝直十金而市舶  
之饒魚鹽之利不可殫述誠得賢士大夫導以生聚均以有無佐國茲家  
勤身睦衆其教尤易而治可久則如君者豈不爲應銘法而使後可述歟  
君生於嘉慶十二年七月十二日卒於光緒六年五月十日年七十有四  
以例授奉政大夫候選同知晉三品銜中議大夫初娶許淑人國子監生  
海女再娶劉淑人貢生濬女三娶丁淑人布政司理問起女皆婉嫕有稱  
儀法咸備異體同愛均鳴鳩之仁服儉執勤協伯鸞之德子金娘光緒五  
年舉人內閣中書許淑人出金銘縣學生爲其叔父後丁淑人出女一適  
同知銜許廣韶早寡以捐田贍族被旨旌表許淑人出鳳池草詔輝映泮  
水之芹烏楔連雲香溢清臺之聚孫男三嗣潔廩膳生嗣濂嗣洮孫女三  
長適縣學生莫兆熊餘幼未字金娘將以今年十月二十五日葬君於縣

之齊景鄉太半橋謝字玗以三淑人祔介其友嘉興許編修景澄來請銘  
銘曰

固其窮漸于豐勤厥躬以施於所同仁聞棣通以享厥終宜食報之必隆  
俾千萬年長保此善人之宮

王杏泉墓志銘

余生十七而孤即出交鄉國士其時宗族親黨已漸衰替然老師宿儒巍  
然負文望者尙十數公其讀書爲秀孝者猶十而八九其學皆足潤一身  
其行皆足式一鄉而最先相識相愛重期許者姻黨中則員外魯封張丈  
景齋與其子明經存齋以增諸生春園顧丈若焱及杏泉王君蓋不過數  
人焉君年長於余十歲先余六年補諸生而皆出侍郎吳姓舫先生門余  
隸學官者八年同學之友無一往還者與君相見亦稀而久益摯且敬咸  
豐戊午余大病幾死來視疾者惟君一人時余已絕意進取入貲爲郎次  
年遂憫惄入都其臨岐相送黯然祖餽者亦惟君而已乙丑余歸自都滄

海之後親明凋盡君與張丈顧丈皆無恙而張蓋老顧居遠城不數見數見者惟君時巡撫馬端敏公延余主叢山講席爲林居墨吏數人所忌不肖之青衿從而和之群吠滿山守令惴恐君益親余輶迹饋問相系余旋辭講席貧益甚至不能舉火而先太夫人復病時余居柯山君數攀小舟來問疾量較方藥憂見顏色及余遭大故來弔且哭者亦惟君一人而已辛未余再入都別君於杭州官京師者又十年感於周旋親故如君之終始如一者之無幾人也益杜門不出同寮同歲之友無一相識者方思得名山一席棄官歸老與君築室鏡湖之瀨徜徉沒世此願不可遂而君已沒矣先是數年張丈與存齋先後卒至己卯春顧丈卒及秋而君卒烏虞余今年僅五十三耳其始交鄉國中以爲天下之大人才不知其幾也及徧交天下士而知聲實之不能相副然後思疇曩之交雖不過三數人真誠而可恃倜然而久長也乃至平生之歡漸滅都盡欲求一人與之盡言而不可得豈不悲哉君諱英瀾字紫生杏泉其號也晚取蘧大夫知非之

義更號曰景瑗先世自上虞遷居會稽曾祖諱家祥祖諱國太國子監生考諱銘府學廩生曾祖妣氏凌祖妣氏金妣氏陶氏馮氏童考妣皆以君官贈朝議大夫及恭人君馮恭人出也生甫晬而馮恭人卒十二歲而孤幼穎敏好學既長補府學生旋食餼試皆第一後累試高等十七試於鄉累薦而卒不雋援例爲金華府學訓導署浦江訓導推升山東益都縣縣丞未上改鄞縣教諭復援例加同知銜君內行甚修有女兄弟二人友愛天至與人無忤色見義奮發振粟濟災死喪相卹又負榦濟才越之將亂編保爲守內數不作其在婺也左當事理軍糈籌畫周至以權宜平東陽之亂尤見方略於時有功喜博覽明於古今之要尤精醫理著有醫辨一書君少以文質張丈張老於文學少許可見君獨奇賞之顧丈文不耀而行篤厚君子也君以余言延之爲諸子師者數年交契三十年如一日顧之卒也屬纖時神明湛然言當與君俱去君生於嘉慶戊寅五月二十一日卒於光緒己卯十月二日年六十有一娶俞恭人生子四繼本府學生

幼慧有文譽早卒其婦孫氏絕粒殉以烈旌余嘗爲文表之者也繼香同治四年補行辛酉壬戌科舉人繼宋殤繼穀府學生以死孝旌世所稱王孝子者也女四凌觀秋陳錫祺其壻也其一殤蓬室葛氏生子一繼業女二孫幾人某某孫女幾人以辛巳某月日葬於王家封之原繼香來請銘其又奚辭銘曰

不知其人視其友以予之見嫉衆口而君益予厚即此足以徵君之所守而它復何有邪君有孝子亦有烈婦施于家者已諭矣而不克展其所負其又將誰咎邪官止墨綬孰端右邪年止下壽孰黃耆邪維張維顧皆君交舊予悲兩君不克有後因并箸之於君志其或託君以不朽邪

姚叔怡墓志銘

光緒四年之春畿輔旱灾秦晉豫皆大祲民之流亡以億萬計其十之一奔赴京師朝廷發帑金爲廠以食耗金錢數十萬猶日不給一時士大夫吁目傷心扶義爭先率錢聚米號譴相救澹災未告繼以瘡疫其最勤事

著功效而先後以疫死者則有翰林編修謝君維藩吳君觀禮戶部主事王君縡名尤在人口而中書科中書姚君恩衍年最少能與諸君子奔走後先散者知之幼者呻之病者凜之死者掩之旦出夜入視如家事冒渴忍飢躬歷日治污穢觸蒸遂以卒死士友咨嗟鄉黨哀悼京尹入告獨以君與謝編修並稱次及戶部主事何君金章等而吳君王君不與焉有旨褒嘉竝如所請下各省督撫取其事實列於志乘論者以爲國家勸善之典超出恆格而下之能致此者亦誠不易也夫謝吳諸君皆年過強仕久踐承明奉使光華清望所係其雖勉爲善猶無足異君以資秩常調齒髮甫壯而能勇於爲義名幾幾出諸君上此其所以尤難也君字叔怡浙江嘉興府之嘉興縣人姚氏自明工部尙書思仁仕萬歷間爲名臣遂大其家世有名德曾祖某官中書丙禱舉人某官殉粵寇之難父文柂由諸生官長蘆運同記名道加布政使銜曾祖妣某祖母沈母張皆封夫人君爲布政次子幼穎悟有至性以祖蔭官中書能勤於職在官十稔妻充差幹

皆謹慎無忒以助振事加五品銜其事親孝成童後即綜理家政纖悉必  
具侍祖母沈太夫人尤得其歡心母張夫人多病君侍疾衣不解帶布政  
官天津君在京師一聞母疾晨夜卽發兼程而至母病危潛禱神乞代及  
旣以拯災感疾處分家事精密如平時疾革作書辭父母以不得長侍奉  
爲大罪父遺之藥猶自力起踴而飲之豫知亡日端坐而逝君生以道光  
己酉二月二十六日戌時卒以光緒戊寅四月十六日酉時娶鍾氏仁和  
人翰林侍讀學士駿聲女生子一壽同庚辰秋布政命君之兄候選道寶  
勳反君之柩於鄉將葬介朱學士適然以許侍講景澄所爲傳來請銘先  
是君卒之十二月許君等具君孝行上禮部復有詔以孝子旌如例故時  
亦稱姚孝子銘曰

是姚氏之良子以恩而仕能繼其世爲國勤事不竟其齒書於州史曰以  
好善死書於閩志曰以孝瘁止惟天子旨如請以賜所以厲天下之爲士

封儒林郎內閣中書舍人翰林院庶吉士楊君墓誌銘

君姓楊氏名慶槐字樹人其先世有名謀者南宋初官明州判官遂居慈谿南鄉之楮山曾祖昌文國子生祖超父兆熊皆諸生母王氏繼母鄭氏君少孤貧讀書通敏能強識既長補博士弟子益淳厲爲經史學訖于老不衰其內行敦備家庭之間恂恂孝友姊適鄭而寡析貲與之撫孤甥成立尤謹祀事依古制于居室之南立彌廟時月設祭復率其族人修葺家廟飭財庄器皆以身任更撰次宗譜以綴繫之君素清約授徒自給而見義奮發樂於振敝戚好乞貸罔不周恤或待以舉火壬辰癸巳遭歲潦荒倡議散儲存活無筈後遇儉歲復行如初辛丑壬寅西夷豕突練鄉爲守聚落以安嘗遇急兵猝未爲備乃洞開里門示以無恐夷不敢犯遂遁而去楮南有谿時患水潦即橋置牕更爲石堰啓閘以時灌田萬畝此皆可記者也君雖屢試不得舉而文章高古爲學者師教其二子咸懇學行而次子太亨遂以所業成進士入翰林所謂不得于躬必得于子子孫者非歟慈銘未嘗識君而在都時與太亨交太亨恭謹竺實喜爲古學嘗乞余撰

其妹貞女傳傳成以寄君君讀之甚喜書諭太亨以爲大榮太亨遂更乞文以壽君予諾之未果比歸而君歿太亨乃奉諱歸而以予文銘其幽矣烏乎是亦可感者已君生於嘉慶丁巳三月某日卒于同治乙丑六月某日得年六十有九以太亨官內閣中書舍人封儒林郎復以太亨改翰林院庶吉士封如其官娶任氏封安人諸生大蛟女諸生高行博學慈人所宗安人承其庭誥相夫教子咸有儀德宗鄉稱焉子二長復亨廩膳生以文名次卽太亨女四長適鄭次適王又次適孫季字業未昏業死矢志不佗先君卒予所爲楊貞女傳者也烏乎觀于貞女而君之爲人與其配偶又可知矣孫六人女孫四人復亨等將以某年月日葬公于珉山之遠是宜爲銘銘曰

處約以亨躬儉以仁舉乎而行端乎而文綰采爵光皤茂秀旣昌其學益豐而後有子克家有女禮宗令名壽考高朗而終生德于鄉歿祭于社維揚文元先賢仰止慈水瀟瀟楮山巖巖千秋萬年有道之辭

中憲大夫仁和高君墓志銘

咸豐初余遊杭州晤高昭伯于湖上與談古今學術文字甚得也既別去十五六年不相聞昔歲丁卯應聘聘校經籍于杭共事有高仲瀛溫溫學古通天文步算詢之則昭伯之弟而昭伯已前歲卒是歲吾友張編修之洞來主浙試榜發多知名士其第四人高雲麟者則仲瀛之弟也既同人多言高氏之昆力學有文皆本庭誥父子兄弟之相師法而前杭州府薛時雨又爲予言高氏世樂善好敝杭之稱素封積德者推高氏予始知中憲君之學行有足垂于後者而君卒矣仲瀛兄弟以所譲行述及譚仲修所爲狀來請銘其曷敢辭按狀君名錫恩字學淳咸豐六年後改今名系出宋武列王瓊南渡時忠節公世則扈蹕遷浙其後人居紹興山陽之前梅里至君曾祖士楨始居杭州爲仁和人祖崇文父鳳墀世有隱德皆以君官累贈至通奉大夫君幼嗜學數歲能爲詩吳祭酒錫麟見之曰此子後必名家旣長益肆力經史爲文章有聲胡學士敬者君姑之夫也推許

尤至嘗試于縣冠其曹會以助振議叙得官被格不與試以例貢生應鄉舉七薦不中遂絕意進取沈酣史籍壹意實用河渠輿地鉛疏雖抉究極原本外務韜晦每賓客盛集論難蜂起歛於默然莫測其深退召弟子縷折是非皆衷於要尤好爲詩歌洞悉正變篇盈數千葩爛薄布生無它耆屏處一室丹黃點勘老不知倦暇庀家政喜慍泯然內外愉愉而事無廢自奉儉約不異寒士中年傷偶旁絕姬侍督課諸子引掖後進見人一善輒不去口少與吳江郭熙山陰鄖鶴征鎮海姚燮及同郡張雲璈龔自珍等經社唱酬文采照耀及其既老又與吳總督振棫許光祿乃釗張中書應昌等爲九老之會春秋佳日扶杖觴詠須眉皓然湖山之間傳爲盛事烏乎今之人際太平席豐厚往往以貨利玩好汨其本心平生素業因之盡廢不幸遭亂所得悉喪遂至俛仰無所自持或從而促其生者多矣若君之日治生產而肅然物外好禮樂道始終一節予以長子孫保宗族經歷常變而神明不衰是固有以至全于天而非流俗之所知者也君累以

助軍營授官同知加道銜中憲大夫著有友石齋集若干卷所存詩爲多其生也以嘉慶九年十月庚申卒于同治八年五月丙戌年六十有六元配趙恭人無子繼配閔恭人婉順執勤咸畢婦德生子之長卽昭伯名炳麟附貢生候選訓導治經精小學以積瘁得心疾卒次卽仲瀛廩貢生試用訓導三雲麟舉人女一適杭州府學生許之淦孫三人爾夔爾伊爾傳閔恭人以前卒仲瀛等以某年月日合葬君子于某山之原銘曰

烏乎是爲好學敦善不忘之君子宜豐而約宜顯而侯宜臻大耋遇耆而止於以昌其詩而谷其侶俾千萬祿永大高氏之世

王秀才暨妻孫烈婦墓表

同治八年四月

吾友金華訓導王君英瀾有才子曰繼本字根仙蓋予始過其塾時根仙甫十齡應對進退俱中儀則五經皆上口學爲文駿駿見頭角又三四年文譽驟起爲詩古文詞下筆數千言皆卓犖有奇氣出應童子試無不冠其曹者明年遂補紹興府學生學益進其鋒銳然老師宿儒歛手退避時

同郡有陳童子壽祥楊童子德榮及根仙之季父今孝廉英淇皆年相若同日爲諸生俱有才氣而根仙爲之冠予竊歎吾越自杜氏尺莊禾子兄弟以幼慧稱卒皆以學名家而後無能繼者文獻未絕後生可畏必有英絕領袖之殆根仙其人歟及予入都逾三載而邑人孫封翁道復者根仙妻孫孺人之大父也以避寇至都爲予言根仙先一歲以暴疾卒又述其女孫殉夫死狀甚烈予爲之驚駭惋恨不寧者累日又數年予歸而訓導更爲予言其詳則益爲之歔歔感歔不能置也夫天地之生才實難既裁之且滋榮之而傾覆相仍使一無有所樹立誠不解其何意矣乃生烈婦以爲之配俾奇節彰著以見其少年立身必有爲妻子觀法者是又交成其令名而或造物之玉人于成者固在此不在彼也根仙世居紹興府城爲會稽人曾祖國太國子監生祖銘府學廩膳生父訓導君以軍功加同知銜倏選知縣母俞宜人根仙生于道光二十三年某月日卒于咸豐十一年六月十九日得年十有九烈與婦根仙同縣同歲生曾祖步康祖道復

皆官教諭封翰林院編修工部郎中父悅祖國子監生母某氏烈婦幼嫋  
靜年十六歸于根仙事舅姑與其夫皆備極婉順夫歿誓不獨生而其父  
監生君又以哭堦暴露亡烈婦仰匍匐赴歸途絕粒家人百計解之終不食  
距其夫之死二十有七日而卒無子以是年八月之望合葬于王家峰之  
麓訓導命其次子孝廉繼香爲狀徵詩文又乞宗濂甫師爲之傳而屬予  
表其墓予惟古人表墓之法凡合葬者例不舉婦人而烈婦既膺旌門之  
典宜得表于阡以根仙之才而無年雖未有成就而英杰卓出之槩已足  
媿世之老死而無聞者又念竝時若陳楊兩童子皆奄忽朝露秀而不實  
以視根仙之有烈婦以箸閨門之奇有賢父及難弟以謀名譽之久蓋亦  
可以無恨用合而表之以舉訓導之悲同治八年夏四月李慈銘表

薛母郭恭人墓志銘

咸豐之季余在京師與陽湖呂編修耀斗桃源尹御史耕雲交最善兩君  
時時爲余道全椒薛淮生侍御之爲人而未相過從亦不知其有賢婦也

同治中假歸時時過杭州侍御之弟恩農觀察方守杭相得甚泊觀察去  
官爲寓公過從益習時侍御已卒恭人挈其子女依觀察於杭始稍稍聞  
恭人之賢教育子女嚴而有恩家庭之間事有儀法旋以次女歸吾友桐  
廬袁君烈白辛未以後二十餘年與袁君同官京師恭人時來省女益習  
閨恭人平生事親之孝相夫之智治家之勤終始夷險完備一節而浙士  
大夫之官京師言內助者無不知袁君之有賢儼好禮游藝崇尚名德有  
林下風益以歎恭人之教爲不可及也比年恭人嗣子葆樞以名孝廉爲  
京官遂就養終焉葆樞以袁君所謹行述且涕泣言恭人平時頗知慈銘  
之不安言本原遺指敘次先狀屬慈銘志其墓其曷敢辭按狀恭人全椒  
郭氏故望族曾大父行有兄弟五人登科官三品卿者父諱士榮歲貢生  
直隸州州同母金安人恭人年二十八始歸侍御爲再繼室逮事姑葉太  
夫人其在室也富而能貧及爲婦也儉素益勵侍御久困諸生聰勉作苦  
耑業不懈旣通籍入翰林轉御史京官奉薄重以海內多故寇氛淳輒島

夷乘之外計內債日夕憂危處困不築米鹽麥雜一以身任其尤可憐者金陵既陷賊烽北指皖桐之間安堵如故人皆懷土無肯徙者恭人獨策其必陷提挈老弱涉歷險阻數千里走京師甫至而全椒不守定陵末年怡鄭得君罪輔助之凶燄日熾國是大壞肆爲嚴刑曾制百官侍御獄獄夢上封事危言深論禍在不測恭人隱相勗厲期盡厥職無以家爲念此其智識固非常人所能窺矣同治改元侍御典試江西未撤隸卒於閩中恭人聞赴欲自裁忼忽中若有神告之以門業負荷爲重者遂茹痛撫孤昏嫁畢臻水檗彌凜卒能再起其家天所相也侍御初娶於王浙江鹽運使鑄之女再娶於吳翰林侍講學士鼐之女有所生女二恭人字之如己出長以嫁士族許鎔楊永言其壻也恭人生女子子五前三人皆殤五適袁君六適山西知縣熊方燠以兄公教授君次子爲後即葆撻也光緒壬午科江南舉人官光祿寺署正恭人生於嘉慶己卯五月十九日卒於光緒壬辰閏六月十八日享年七十有四次年三月歸葬於羅梁山之先塋

慈銘竊惟婦人以嬌靜爲德其不幸以節烈見者非始願也然古之志列女兼取才藝亦必有奇特殊異之觀其爲傳列女者所不及而能相夫迪子克成忠孝興立門戶在前史所稱如唐李景讓之母鄭楊憑之叔母薛宋蘇易簡之母薛賈黃中之母王歐陽文忠之母鄭皆以婦德母儀詒範百代雖無瑰行偉聞而有裨於國有造於厥家校之摩笄截臂爲功於名教一焉嗚呼恭人章妻滂母殆兼之而不有其名者矣系之銘曰

是相所天爲真諫官銜哀自全室家以完有子帥先有女儼賢胡不百年下從九原貞柏芳蘭長豐其阡

王母鮑太夫人墓志銘

光緒八年四月

慈銘自同治壬申與今國子祭酒王君先謙相識甚疏也甲戌會試卷在祭酒房力薦之恆得而以文字違格卒被擯心感祭酒然輶迹益以邊庚辰成進士祭酒爲鄰房同考官揭榜時見慈銘名以其老也感唏之甚既慈銘呈牒翰林院乞守故官祭酒力沮不能得歎惜累日慈銘始益感祭

酒交日密於是始知祭酒之有賢母而祭酒門祚之單隻太夫人身世之劬勞始一一聞之祭酒事親孝太夫人年高多病自昔歲後疾瘳作祭酒朝夕左右若孺子每爲慈銘言之慘戚不自勝慈銘亦心憂之相見必亟問起居今年三月七日祭酒有事東陵越日而太夫人病作遂以不起嗚呼鮮民之痛天下無如慈銘之酷者交游中有親在者羨之極而感泣惟恐其樂之不長懼其老而憂其病不啻其在身也補贊搃羽哀鳴相聞其相感之悲有不能喻之它人者既祭酒以所次太夫人年譜屬爲志墓之文其曷敢辭按譜太夫人姓鮑氏先由徽州遷湖南長沙府善化縣父太學生諱敦富母氏熊幼失恃終鮮兄弟事父孝年十九歸贈通議大夫長沙王公載之逮事王舅姑及舅姑皆得其歡心贈公祖父皆諸生家貧世以教讀自給太夫人仰事俯育盡其力養生送死盡其誠和婦嫋鷯嫋黨嘗竟日一餐而甘旨無缺或飯時訝故不食嚴寒身著夏布中衣而操作益勤時堂上溫清而裘繕之其兄公卒迎長嫂同居病視之惟謹五年無

倦色門以內熙熙如也生丈夫子四皆躬自授書皋長君次君各授室能文次君以高材生食餼而先後夭歿俱無子贈公以痛子亦卒時祭酒已補諸生其季尙少粵寇方熾跋躡湖北祭酒從軍鄂皖之交太夫人忍死以全厥家其勞瘁而心傷蓋有不忍言者既祭酒連掇科第入翰林奉使雲南假歸省視季君亦以諸生得官未及上夫婦遽逝亦無子於是祭酒迎太夫人及孀姊寡嫂俱至京師凡十年色養甚備而祭酒連殤子女先是贈公有兩兄皆無後太夫人念家世之衰殄子姓之不育常戚戚不怡欲求一日飴含弄孫以慰暮年而不可得此祭酒述之輒號慟也慈銘竊惟太夫人之所處誠備生人之極艱其所行雖亦閨門之庸德然以富貴婦人處之有不可以終日者即其後親見克家清華撫養而殤折之慘無歲無之嘗讀昌黎苗夫人之志所謂歲時孩嬰嚦笑滿前者幾以爲奇福不可倖也然以視不肖如慈銘者母氏勞苦而無一日之養兄弟限瞽嗣育剝絕而不得以區區之科名逮親之存則祭酒之所以事太夫人

者豈不猶在天衢哉是亦可以無憾已太夫人生於嘉慶戊辰六月十九日卒於光緒壬午三月十六日享年七十有五距贈公之勅二十有二年子四長先和次先惠廩膳生三即祭酒同治乙丑翰林至今官四先恭縣學生分省補用知府女四次適候選知縣善化龔運防其三皆殤以祭酒貴封由太安人晉宜人恭人至太夫人以某年月日葬某鄉某原銘曰先儒蕺山劉子有言平生未嘗言及二親者傷心之甚不忍言也母也天只孰酬恩也維太夫人生備百屯而終享鼎茵也象賢有子爲名臣也胡天靳之未堯期而撫孫也維艱維劬以成厥家終大其門也高明令終歸儻於原也因祭酒之錫類以慟吾親欲培皋魚之淚於瀧岡之阡也

節母謝孺人墓志銘同治三年三月

確山教諭謝昌玉將葬其母錢孺人以禮部郎中王君之狀來請銘教諭故越產而僑河內者也與余有鄉誼不敢辭按狀孺人餘姚人興國縣知縣諱樓之女適文學君世琛謝故妣之望族自明少傅大學士文正公以

後簪帶相望至文學君家日落文學又屢試不利姑老病癃篤蓐處者八年孺人奉事祈禱無不至更以餘力紡紈佐文學讀及文學卒孺人年二十九一子三女皆幼貧益甚并日而食孺人督課無少間以訖于成人及昌玉得官乃就養于學舍以咸豐九年二月卒年六十有三女皆適名族某某其婿也孫一人某其年河南士夫爲請旌于朝余惟國家表揚貞節之典厚矣例由子孫上其事有司以聞攷帑金建坊自道光末有建議更制者於是郡邑會計合以上請而天下之以節入告者減舊額半矣然觀禮部檔冊歲被旌者尙千百人而求之故家大族往往數十房不得一人或數百年僅得一二人是豈盡名達天子者之難歟若孺人之生享祿奉歿備綽楔始約終享亦云僅矣是宜爲銘銘曰

廿乎劬安乎瘠以嬖其姑以勗其夫夫不祿以育其藐孤蔚然母教成師儒朝章奕奕旌厥閭我爲表阡辭勿渝

三冊四十  
四頁上

南皮張氏兩節母傳

戰孺人直隸河間府甯津人父麟書母李孺人無兄弟年十七嫁同郡南皮張君全懋爲繼室張君讀書奮發有當世志孺人佐之無內顧憂張君既補縣學廩生遂入都受業衡山彭修撰浚之門舉嘉慶丙子優貢道光辛巳恩科舉人十餘年中時歸省親即復去孺人奉翁姑甘旨甚備操作節儉以撫子女洎癸未張君卒於京師孺入年未三十也家日以落孺人事堂上益虔又迎其父母至家漪瀾絜香日侍兩堂子女繞側色笑怡怡蓋爲舅姑者忘其喪良子焉爲父母者忘其無子而依女焉爲子女者忘其無父而孤焉養生送死備極哀禮二子繼天撫嗣子祖述爲之娶婦楊女嫁同縣周氏皆恩紀周至教以義方嘗進子女羣從而謂之曰吾家世清白貧者分也子孫若墜先訓犯非禮則辱及九族甚於絕嗣孺人精女工自廢居後仰事俯蓄祭葬嫁娶皆仰給十指嘗語人曰守節之要惟勤女工非止禦飢寒也且可以祛妄念吾願與天下未亡人共寶之孺人以

同治九年四月卒年七十有六守節者四十八年

姜孺人直隸天津府滄州人父克勝母張繼母林孺人早喪所生時父適他出孺人哀號撻踊朝暮上食感動旁人及父更娶頗失後母歡孺人事之益謹後母感之遂加慈愛孺人年十九歸南皮張君全儒與戰孺人爲姊姒也初張君之父生四子君其季庶子也爲縣諸生倜儻好施不事生產以故家日落孺人拮据佐助無幾微見顏色事姑劉及夫之生母周備盡孝敬以周故終身不道妾字夫兄全憐之卒也戰孺人艱瘁甚家人皆易之孺人事之如兄姊字其女如己女凡堂上侍奉勞苦之事兩孺人者無不偕也翁性嚴每察理家政有所訶責家人皆匿不敢見咸推孺人應之有過輒自任受責厲者無數及翁病瘽口不能言子孫侍疾孺人專任飲食湯藥晝夜不解時子生甫而月失乳而死孺人已殤數子矣人皆痛之而孺人不遑恤也翁歿後服未闋張君亦卒負責如牛毛孺人悉所有償之賣其宅遂居陋巷中儲無斗升力疾紡織恒并日而食時周年已七十矣篤老多病孺人雅不喜佛法始以周病遂終身不茹葷孺人嘗病疫

周焚香禱天曰天乎莫奪我孝婦也及周臨殉執孺人手泣曰不再累我  
婦矣戰孺人既無子其母迎養於家亦卒女又適人孺人念其獨也每日  
事畢卽同坐燈下談古今忠孝節義及家常瑣事視其倦始退孺人幼喜  
讀經史尤惜字凡器物有字者雖糞溺中必檢出之滌而焚燬一波一點  
亦不忍棄也孺人止一子祖繼待之極嚴始入塾屢遣人請其師嚴夏楚  
之祖繼童時嘗詈僕婦孺人怒曰彼及事若祖父母若父尙不敢苛責沉  
若乳臭子乎命跪庭中撻之咸豐三年粵賊之犯畿輔也縣城戒嚴警報  
沓至孺人歎曰賊至死卽晚矣祖繼強奉之出城遂不食百方勸之不聽  
嘔血數日病不能起九月二十四日賊破交河縣令山東孔君父子死之  
孺人聞之贊歎不已二十五日破滄州時孺人父母尙在伏枕慟哭絕  
數次遂絕水飲求速死越三日卒臨終戒祖繼曰遇賊甯死勿被掠賊若  
據城勿受役遠吾言非吾子也孺人一女自五歲後非起居祖父母不許  
出閨門嫁同縣尹氏早寡祖繼娶婦隋有二孫孺人卒時年五十計守節

十五年同治三年冬其族人翰林院編修張之洞以兩孺人節行聞於朝各旌表如例

李慈銘曰南皮張氏北方世族也予始交孝達編修其人忼慨有大節繼識愍民布衣卽姜孺人之子祖繼也貧老館於劉侍郎師家負氣杰然取與一介不苟見當世知名士卽屏氣蹙額道其先世義行節槩求爲之傳嘗爲予言其族分數房宅房多顯貴或訾巨萬而其一宗獨貧亦無大官予謂世家之所重者節義也人世紛華富貴俗人之所欲羨而天地之氣所持以不敝者則在一二孤寒况瘁歌哭無語之人故國賴之以立教家賴之以垂法祖宗得以衍其澤子孫得以蔭其福其所系者豈不重哉觀兩節婦之茹蘂含冰中智以往猶能強而爲之若戰孺人謂女工可以勵節姜孺人謂賊至而死已晚及臨歿戒子之言斯言也建諸天地質諸鬼神而百世聖人所爲監臨以出之者也以今所聞婦女之大貴而壽考者若常熟翁氏許太夫人合肥李氏李太夫人項城袁氏郭太夫人皆備極

鼎鐘華膾之養卽張氏之宗子青尙書之母孟太夫人年躋九齡予以魏科致位八坐秉節兼圻就養吳會顯融赫奕誠震人寰然盛冬沴寒非有松柏冰雪之節則桃李無以炫其華而生物之氣將幾乎息矣由此論之世族之慶固在此而不在彼也兩節婦之翁諱元城者廻岸武烈見義必爲志於用世以諸生終孝廉茂才或孝友篤敬或豪俠開爽皆古所謂淑人君子而兩節婦以節烈佐之此其食報宜何如者烏虗天道不可謬也其在後之人與其在後之人與

二烈婦合傳

林烈婦李氏山陰人父鳳祥貧窶早喪妻以烈婦適郡中林氏子待年未成禮林氏故賤不齒其姑柯又故倡也諸惡少年日輒跡其家柯性狡而賊虐烈婦于幼及烈婦長有色姑自視无以當諸少年諸少年迫脅之姑與翁謀乃具飾烈婦逼侍不識者飲酒烈婦不肯則益縱羣不逞戲辱之烈婦喝哭欲死則大怒曰予烈婦鞭馴絕其食必徇從乃已烈婦哀隣媼

夜道歸其父父先賣餅于杭州走匿所戚家數日林訥知之徑前要百端而好語烈婦令還烈婦慨然謂所戚曰吾無家出將安歸雖然不可以棄吾知死所矣遂從林歸歸則閑烈婦室棘楚益苦亡完膚稍尉勸之唏曰是可從康速死耳翁媼憤甚夜以帛絞烈婦足擊地震震有聲鼻血出如縷无一語哀免遂死時咸豐二年壬子九月十九日也蓋烈婦年十六矣次日所戚者致鳳祥于杭鳳祥鳴之官讞未得實越二年八月二十日而金烈婦李氏亦死于慈谿

金烈婦者象山人年十七嫁慈谿城中捕魚者金某爲繼妻凡三年金爲人漁久不歸金母龔與典肆湯某者故昵湯豔烈婦貨龔番銀百餅屬誘婦再三婦泣斷左手中指視姑曰如此指矣龔怒裸而挾絕枝不已乃潛掘地牢荐以礫赤婦體下之儲不繫食其旁使手可搜更日夕燒鐵鉗灼灼然粹其身盡糜自五月至八月終不屈姑乃鑿之死前一日中秋計殺以沸湯有婦人覓備寓其家爲哀之會天慘然霑填填心思而止婦人密

語其隣鄰詒龔出集里中嫗閨而入視婦宛轉窓中蛆徧體蠕動矣問所苦喘而言曰吾期不負吾夫而至是命也隣滌而衣之卑以版扉詣邑令令臨視婦一呻死遂論龔絞而旌婦于朝至咸豐之七年山陰令始結林氏獄姑瘦死治翁如律官葬林婦于西郭外官道旁建祠祀之旌表以貞烈詔曰可

論曰死生之際大矣乃若計窮勢竭取彼俄頃強忍者夫能爲之至以身爲糜越月朞時而飴之不悔者豈血性之勇使然哉彼兩烈婦者抗其至尊且親之人以必行其志乃阽于死而不悔或以古之忠臣若楊忠愍左忠毅比烏乎朝廷方死之雖變節而亦不可生兩烈婦固輶轉阱獄然其家千金之寶不啻也苟出一言立衽席之靡衣媿食惟恐其不悅矣迺寡忍生人之至慘而全節以歿嗚呼偉與可謂奇女子矣吾獨異兩人相望不一年而皆出於吾越其殆聞風而起者與然則生其地者士大夫宜何如邪烏乎彼兩烈婦者豈嘗學問哉

楊貞女傳 同治三年二月

貞父楊氏慈谿人父慶槐附貢生貞女年十五許字同邑葉金齡越三載金齡病瘵死貞女聞之欲同死家人環守之且許持服乃止服斬衰爲位哭泣盡哀既間稍稍勸以改字輒大慟又覓死已投繯矣數之得蘇越五載志益堅父母爲請于葉而歸之事舅姑一家稱其孝撫兄之子爲嗣嚴而有恩咸豐十一年六月卒于葉氏年二十五貞女之兄內閣舍人太亨恭謹誠篤人也爲予言如此舍人又曰當庚申歲賊之窺浙東也予視妹叩以行止妹慨然曰寇亟矣吾不能竄山谷求苟免吾辦此早矣指舍後眢井曰是吾死所也兄他日來收吾骨言訖淚涔涔下及卒後搜其遺笥得裹服一襲鉤綴聯貫不可得解云

論曰節行之艱者聖人不敢以望之人故禮不禁改適況改字乎而豎儒惄惄不達此旨遂以不改字者爲過是誠何心哉觀貞女截髮勞面五年而後遂是豈出于勉強者所能耶蓋吾越近十年來貞姝烈媛風節相望

以予所見死烈者有山陰林烈婦李氏慈谿金烈婦李氏會稽王烈婦孫氏死貞者有山陰杜太守寶辰女金上舍某女會稽王訓導慶恩女而粵逆之變婦女死難者至數百人以視崇階高閥之縉紳或持節奔竄或幽閉拘辱大率淟涊污垢汚帳轉自免其賢不肖爲何如耶抑江東節義之氣有時鍾于閭閻而彼之偷生者亦勢非能自主耶烏虞

三冊三九  
頁九上

### 貓娘傳

貓娘者居越城偏門外不知其姓氏販婦人珠翠衣襦之屬以爲生有年矣貌皺黑每出城市喜塗粉黛其面結髮爲十餘鬟以紅棉纏之縷插花艸其上修視齶笑嬉游闌闊間往往多得錢文去余見之蓋年四五十矣時虛市人散湖橋夕陽中一老醜婦顧景行紅紫搖搖滿頭兒僮數十喧繞之爭唱以爲貓娘歸也

論曰甚矣天下之大也蓋變其術以遊于世者固窮亡復之矣若貓娘者宜其稱也夫世之人莫不好研而惡醜而醜之甚者知必不可於世也乃

益假妍以自形果以是取笑於世而世人不之覺已群售其醜矣然則世之好惡真不可持哉雖然予初見貓娘則怒以爲妖也繼得其故則爲感歎而不能已嗚乎其感也可思矣